

Date – 07/10/2025

Time - 18:30 -18:40Hrs

AKASHVANI AIZAWL
REGIONAL NEWS BULLETIN
HEADLINES (EVENING)

1. Larsap, General (Retd) Vijay Kumar Singhan RIPANS chu India hmarchhaka hriselna lam inzirtirna hmasawn chak zia entirna hmun pawimawh tak a ni, a ti.
2. Commerce & Industries Minister Pu F. Rodinglian 'The Industrial and Investment Policy of Mizoram, 2025' leh 'The Mizoram Procurement Preference Policy for MSEs, 2025' a tlangzarh.
3. Prime Minister Narendra Modia chuan kum 11 kalta chhung khan ramchhungah danglamna nasa tak a thleng tih a sawi.
4. Sawrkar laipui chuan kum 2029 hmaa ralthuam lam siamchhuahnaah cheng vaibelchhe nuai thum hu siam hman a tum

<><><>

RIPANS LAMP LIGHTING

Larsap, General (Retd) Vijay Kumar Singhan RIPANS chu India hmarchhaka hriselna lam inzirtirna hmasawn chak zia entirna hmun pawimawh tak a ni, a ti

Vawiina RIPANS)25th Graduation and Lamp Lighting Ceremony, 2025 RIPANS Auditorium-a buatsaih a hmanpuinaah he thu hi sawiin Larsap chuan India ram mai piah lama ram pawn

thlenga thawk tur mithiam tak takte chher chhuaktu a ni thei a ti a. RIPANS-a khum 100-awmna Hospital sak chuan Mizoram health care a tih changtlun dawn mai bakah zirlaite a tanpui dawn a, hei hi PM hmathlir, 'Sabka Saath Sabka Vikas, Sabka Vishwas, Sabka Prayas' a taka lantirna a ni, a ti bawk.

RIPANS hi March ni 30, 1995 ah din niin, North Eastern State 8 te bakah India ram hmun dangte tan seat siam a ni a. Avaiin zirna seat 243: B.Sc Nursing 50, B.Sc MLT 40, B.Pharm 40, B.Sc RIT 40, B.Optom 40 leh BPT 33 te a awm mek a. Kumin hian Under Graduate 173 leh Post Graduate 45, avaiin zirlai degree hlan thar 218 an awm a. Chhinchhiah danin RIPANS atang hian vawiin thlengin Under Graduate 2,815 leh Post Graduate 166 te an chhuak tawh a ni.



RAILWAYS MEETING

Kolasib DC Pu Robert Lalhmangaiha kaihhruai in District hotute leh Indian Railways a thawktuten Rel kawng siam kaihhnawih a thil pawimawh hrang hrang vawiin khan Kolasib ah an sawiho.

Thutkhawmnaah hian thu pawimawh tak tak rel ho niin, Rel kawng laiha a leivung thenfai loh te leh Rel kawng kama in sak bungrua hman bang, cement leh thir tuiek te chu hnawmhnawk a nih piahlamah leilung leh nungchate tan a hlauhawm theih avangin a rang thei ang bera tihfai a, sawrkarin bawlhhlawh paihna atana hmun a ruatah fel taka paih tur a Railway lam aiawhte hi sawipui an ni a. Hemi piahlamah ah hian chetsualna leh nunna chan an awm tawh lohna turin Rel kawng hnaiha awm leh chet vel a hlauhawmzia mipuia zirtirna pe turin Railways leh Village Council-te tangkawpin awareness program huaihawt se tih a ni bawk.

He hunah hian ram neitute hnena zangnadawmna la pek fel loh chungchang pawh sawilan a ni a. DC chuan Railway hotute chu zangnadawmna la chinfel loh zawng zawngte a rang thei ang bera chingfel turin a ngen nghal a ni.



COMMERCE & INDUSTRIES

Commerce & Industries Minister Pu F. Rodingliana chuan vawiin khan Aizawl Vanapa Hall-ah ‘The Industrial and Investment Policy of Mizoram, 2025’ leh ‘The Mizoram Procurement Preference Policy for MSEs, 2025’ a tlangzarh

Pu F Rodingliana chuan Mizote zingah mahni siam ngaihsan lohna a lian thin tih a sawi a, vawiinah chuan mahni thar ngaihsan leh ngaihhlut thiam a tul tih sawiin industry chu Mizoram din chhuahna tur pawimawh tak a nih avangin ZPM sorkar chuan industry hi an ngaihpawimawh thu leh tuna policy pahnih tlangzarh tâk pawh hi industry dintute tana hmasawna tur a nih thu a sawi.

Industry din duh taktakte tan hma an la tih sawiin Pu F Rodingliana chuan, industry din duhtute hnenah ram an pe ang a, policy-in an umzui ang a, pension awm lo, tu leh fate thlenga eizawna ngialnghet insiamna tur atan kawng an hawng ang a ti a, Lengtêah leh Luangmualah te plot an siamthat mek thu sawiin industry ramah ram âwl a tam thu leh industry din duhte tana ram an zawnin a ram neitu an lo awm zel thu a sawi.

The Mizoram Procurement Preference Policy for MSEs, 2025 hmang hian Mizoram sorkar chuan Mizoram chhunga industry dintu emaw, thilsiamtu/service petute thil siam chhuah chu a leisak thin dawn a, hemi tur hian policy hnuaiah inziahluh a ngai a ni.

Policy hnuaia inziaklutte hian inziaklut ve lote aiin sorkara thil an hralh turah zaa 12 china an chhanna a san zawk pawhin duhsakna pek zawk a ni dawn a, bungrua/service lei tum sorkar departmentte chuan kum khat chhunga an thil lei tur zawng zawng atanga zaa 25 chu he policy hnuaia inziaklutte hnen atangin an lei ngei a ngai bawk.



HEALTH MINISTER

Health & Family Welfare Minister Pi Lalrinpuiin nikum aiin kuminah malaria kai leh thihpui tlem deuh mah se hmun dang nena khaikhin chuan ngaihshawh tham a la ni, a ti

Vawiin khan Assembly Annex Building Conference Hall-ah National Vector Borne Disease Control Programme (NVBDPC), Health & Family Welfare Department buatsaih, ni thum awh tur, ‘3 Day Regional Review Meeting on Malaria Elimination for GFATM Project States’ hawnna hun a hmanpui a, he hunah hian thusawiin Health Minister chuan Mizoram chu India rama malaria vei awm tamna ber a nih avangin tihrem kawngah tha thara beih a ngaih thu sawiin, Mizorama district 4 te chu Category 3 – High Endemic an la nih thu leh malaria vei tharte zinga zaa 80 dawn chu he’ng district atanga hmuhchhuah an nih thu a sawi a. Inhrilhhriatna tha neih leh invenna a pawimawh tih a sawi a ni.

Health Minister chuan a. Malaria natna do kawnga hmatawng tur, health worker 100 lak tum mek a nih thu sawiin, malaria do kawnga sawrkar hmalaknate a tarlang a. He natna do tur hian khawtlang leh NGO-te nena tanrual a ngai a ti.

Ramchhung State hrang hrang atanga VBD lama thawktu mi 70 vel he hunah hian an rawn tel a. He meeting, ni 3 chhung awh turah hian India rama Malaria natna umbo a nih theih nana hmasawnna tur zirhona hun neih a nih dawn bakah Malaria tihremna kawnga Programme hmalakna hrang hrangte thlirhona neih thin a ni.

Tun dinhmunah Mizoram chu India rama Malaria tamna ber state ni mekin, District 4 - Lunglei, Lawngtlai, Mamit leh Siaha-te chu Malaria tamna district an ni a. Kumin 2025 Jan – Sept thla chhung khan Mizoramah Malaria vei mi 7321 hmuhchhuah tawh niin, Malaria avanga nunna chan mi 6 an awm tawh bawk. Nikum, kum 2024 Jan – Dec chhungin Malaria natna hmuhchhuah zawng zawng mi 16899 niin, nunna chan mi 7 an awm bawk.

<><><>

LUNGLEI/KHAWZAWL DISHA

Vawiin khan Lunglei District Development Co-ordination and Monitoring Committee (DISHA) chu an Chairman, Lok Sabha MP Pu Richard Vanlalmangaiha hovin Lunglei DC Conference Hall-ah an thu khawm a.

Chairman Pu Richard Vanlalmangaiha chuan Lungleia DISHA thut khawm chu Lok Sabha MP a nih anga DISHA thut khawm a kaihhruai hmasak ber tur a nih avangin chhinchhiah tlak a tih thu sawiin, DISHA-a sawrkar laipui ruahmanna hnuaia hmasawnna hna thawh dan thlir hona chuan ram hmasawnna kawngah rah tha tak a chhuah a beisei thu a sawi a. Line department-te inbuatsaihna leh hna thawh fakin, hlawhtling leh awmze nei zawka hmasawnna hna thawh kalpui a nih theih nan department hrang hrangte chu an hma zawn theuhvah theih tawp chhuah chhonzawm zel turin a chah a. Scheme kalpuinaa harsatna awmte pawh inthlahrung lova a hnena thlen thin tura chahin, a theih ang anga chin fel dan ngaihtuahpui a inhuam thu a sawi.

Lunglei DISHA thut khawmah hian Sawrkar kum kal mek 2025-2026 1st Quarter leh 2nd Quarter (April - September) inkar chhunga Lunglei District-a sawrkar laipui ruahmanna hnuaia hmasawnna hna hrang hrang kalpui dan thlir ho niin, harsatna awmte leh a chin fel dan tur leh hma lak zui zel dan tur te sawi ho a ni.

He huna tarlan anih danin, MGNREGS hnuaiah Lunglei District-ah job card nung lai 20,162 awm mekin, April-September 2025 chhungin ni 59 inhlawhna siam a ni tawh a. Material component atanga hna thawh 1,426 awmin, hna 623 thawh zawh tawh a ni a, thawh lai mek 803 a la awm a ni.

DISHA hi sawrkar laipui hmalakna niin district-a hmasawnna chak zawk leh mumal zawk a awm theih nana sawrkar hnathawkte thawhhona tha siam a tum a, thla 3 danah an inhmukhawm thin a ni. Ministry of Rural Development hmalakna a ni a, Member of Parliament, Lok Sabha hi chairman niin Bawrhsap hi member-secretary a ni.

<><><>

MNF

MNF party President Pu Zoramthangan Forest Conservation Amendment Act 2023 hman tumna chuan Martar-na hnam thinhnun a khawih a, na takin an su dawn a ti a, tun thla ni 29 khian Mizoram pumah FCAA hman duh lohna leh Mizorama hmanna tura Assembly resolution sût tura sorkar kar nan total bandh huaihawt an tum tih a sawi.

Pu Zoramthanga kaihhruai hian vawiin khan MNF National Executive Committee chu Aizawl Venghluia Central Hall-ah an thukhawm a; FCAA 2023 duh lohna leh Mizoram sorkarin a pawm tawh sût tura sorkar kar nan hmalak dan tur hi an rêl a ni.

Pu Zoramthanga chuan FCAA an duh loh thu leh Assembly-in a pawm tawhna sûtna atan special assembly ko tura ngenna sorkarah an thehlut tawh chuan awmzia a nei lo tih a sawi a; ZPM sorkarin FCAA 2023 a adopt chu an duh lo tak zet tih sawiin, he thil hian martarna hnam thinhnûn a khawih a, na takin an su dawn tih a sawi a ni.

MNF hruaitute thukhawm hian resolution an siam a, an resolution ah chuan Mizoram inhumhimna bang, Peace Accord avanga a neih India Constitution Art.371G engmahlova chantir a, FCAA 2023 pawmpuitu Pu Lalduhoma kaihhruai, ZPM Sawrkar thil tih pawizia hi a takin a lang chho zel dawn a. State rohlu tam tak central kuta lo pe rutu Chief Minister neih chu a pawi takzet a ni an ti a. Thingtam avanga Sazu puang mekah Sazu tihrem kawngah leh Sazuten an thlai leh a rah a tihchhiat sakte chhawmdawl kawngah Mizoram Sawrkar chu a tih tur a tilo nasa hle a an ti bawk a, Zoram hmun tina kawngpui chhe em emin a nghawng lirthei neitute leh a chhawrtu Mipuiten harsatna tawh mek siamtha turin a siamna tura mipuia chhiah nasa tak an lak tlingkhawm hmangin a rang thei ang berin siam nghal se an ti a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

PM

Prime Minister Narendra Modia chuan kum 11 kalta chhung khan ramchhungah danglamna nasa tak a thleng tih a sawi. Pu Modia chuan kum 25 chhung ram hruaitu anih cham puala social media-a a thuchahah he thu hi tarlangin ramchhunga hmeichhiate dinhmun chawikan ni a, thalai leh loneitute dinhmun nasa taka tihhmasawn a ni a ti a. Mi rethei vaibelchhe 25 chuang khaichhuah an nih thu a sawi a. Khawvel sum leh pai chetvelnaah pawh India chuan hmabak eng tak a nei tih a sawi a ni.

<><><>

DBT

Union Finance Minister Nirmala Sitharaman-i chuan Direct Benifit Transfer hman anih hnuah sawrkarin cheng vaibelchhe nuai li sing 3 leh sang 1 chuang a hum a ti. Vawiina GIFT city-a hman tur Foreign Currency Settlement System, Mumbaia a hawnnaah he thu hi sawiin Pi Sithramani chuan DBT system Gift City ah reilote chhungin awlsam taka hman theih a ni ang a ti a. Tun dinhmunah hian GIFT city ah hian foreign Currency settlement atan hian darkar 36 atanga 54 nghah a ngai a ni.

<><><>

DEFENCE

Sawrkhar laipui chuan kum 2029 hmaa ralthuam lam siamchhuahnaah cheng vaibelchhe nuai thum hu siam hman a tum. Defence Minister Rajnath Singha chuan vawiin khan New Delhi-a Conference on Opportunities in Defence Manufacturing a hawnnaah he thu hi sawiin kum 2029 ah chuan rampawna ralthuam siam an thawchhuah pawh cheng vaibelchhe sing nga hu a tling tawh ang a ti a. Ralthuam siamchhuahna lamah nasa takin ram a thang tih sawiin kum 2014 ah cheng vaibelchhe sing li leh sang 6 hu chauh siam anih laiin tunah chuan cheng vaibelchhe nuai 1 leh sing 5 hu siamchhuah tawh a ni a ti a. Defence Export pawh cheng vaibelchhe sing 2 leh sang li chuang hu a tling tawh a ti bawk.

<><><>